



REPUBLIKA E KOSOVËS/REPUBLIKA KOSOVA

GJYKATA THEMELORE GJAKOVË - DEGA E GJYKATËS MALISHEVË

Numri i lëndës: 2024:013916

Datë: 05.02.2025

Numri i dokumentit: 06804405

**C.nr.25/2024**

**GJYKATA THEMELORE GJAKOVË / DEGA NË MALISHEVË**, Departamenti i Përgjithshëm - Divizioni Civil, gjyqtari Petrit Curri, me bashkëpunëtorin profesional Senad Telaku, në çështjen juridike kontestimore të paditësit Z.K.nga fshati L.-Komuna e Malishevës, të cilin me autorizim e përfaqëson Fitim Gashi, avokat në Prishtinë, me adresë rr. "Fehmi Agani", Hy-25/4, kundër të paditurës Komuna e Malishevës-Drejtoria Komunale e Arsimit dhe Edukimit, të cilën e përfaqëson avokati publik komunal Mujë Sahitaj, sipas bazës juridike kompensimi i të ardhurave nga marrëdhënia e punës mbi bazën e kualifikimit-licencimit, vlera e kontestit 1,328.40 Euro, jashtë seancës gjyqësore, me datë 05.02.2025 mori këtë:

**A K T G J Y K I M**

- I. APROVOHET pjesërisht si e bazuar** kërkesëpadia e paditësit Z.K.nga fshati L.-Komuna e Malishevës dhe **DETYROHET** e paditura Komuna e Malishevës-Drejtoria Komunale e Arsimit dhe Edukimit, që në emër të kompensimit të të ardhurave nga marrëdhënia e punës mbi bazën e kualifikimit-licencimit, për periudhën kohore nga data 01.02.2021 e deri me datë 06.02.2023 apo për 24 muaj, (për çdo muaj shumën e mbetur prej 52.63 Euro, në emër të diferencës së papaguar të kualifikimit ose licencimit, të shkallës prej 27% të pagës bazë-400.14 Euro), t'ia paguaj paditësit të lartcekur shumën e përgjithshme prej 1,263.12 Euro (njëmijë e dyqind e gjashtëdhjetë e tre Euro e dymbëdhjetë cent), me kamatë ligjore prej 8%, e cila do të llogaritet nga data 07.12.2023 (datë e paraqitjes së padisë), e deri në pagesën definitive, në afat prej 7 ditësh, pas plotfuqishmërisë së aktgjykimit, nën kërcënim të përmbarimit.
- II. REFUZOHET** pjesa tjetër e kërkesëpadisë së paditësit, përtej shumës së gjykuar sikurse në pikën I. të dispozitivit të këtij aktgjykimi, përkatësisht shuma prej 65.28 Euro (gjashtëdhjetë e pesë Euro e njëzetë e tetë cent), e kërkuar në emër të kompensimit të të ardhurave nga marrëdhënia e punës mbi bazën e kualifikimit-licencimit, **si e pabazuar**.
- III. DETYROHET** e paditura Komuna e Malishevës - Drejtoria Komunale e Arsimit dhe Edukimit, që paditësit t'ia kompensojë shpenzimet e procedurës në shumën e përgjithshme prej 124.00 Euro (njëqind e njëzet e katër Euro), në afat prej 7 ditësh, pas plotfuqishmërisë së aktgjykimit, nën kërcënim të përmbarimit.

**A r s y e t i m**

Paditësi Z.K.nga fshati L.-Komuna e Malishevës përmes së autorizuarit të tij Fitim Gashi, avokat në Prishtinë, në këtë gjykatë me datën 07.12.2023, ka ushtruar padi kundër të paditurës Komuna e Malishevës – Drejtoria Komunale e Arsimit dhe Edukimit, për kompensimin e të ardhurave nga marrëdhënia e punës mbi bazën e kualifikimit-licencimit, duke theksuar se paditësi është i punësuar tek e paditura si mësimdhënës i lëndëve të gjeografisë, historisë dhe mësimi zgjedhor në shkollën SHFMU “V.K.” në fshatin Drenoc-Komuna e Malishevës. Ka kërkuar që në emër të kualifikimit, paditësit t’i paguhet diferenca në pagë nga data 01.02.2021 deri me datë 06.02.2023, në shumën prej 1,328.40 Euro, duke kërkuar kamatën ligjore, si dhe shpenzimet procedurale.

Gjykata pas shqyrtimit paraprak të padisë së paditësit, e ka njoftuar të paditurën me aktvendim mbi dhënien e përgjigjes në padi.

E paditura Komuna e Malishevës, përmes së autorizuarit së saj Mujë Sahitaj-avokat publik i komunës, në këtë gjykatë ka parashtruar përgjigje në padi me datë 31.10.2024, ku ka theksuar se në këtë rast lidhur me pagesën e kualifikimit nuk ka asnjë bazë ligjore në kontratën kolektive, për faktin se në bazë të kontratës së mësimdhënësve kualifikimi u paguhet çdo mësimdhënësi që është paraqitur në kontratën e punës gradimi mbi pagën bazë. Tutje ka theksuar se bazuar në Kontratën Kolektive të Arsimit në Kosovë të datës 18.04.2021, në veçanti në nenin 7 pika 1.3 të kësaj kontrate përcaktohet se me licencim fitohet e drejta për punë, avancim në karrierë dhe zhvillim profesional në bazë të legjislacionit të punës në fuqi dhe se të punësuarve u mundësohet kualifikimi pa shkëputje nga puna sipas legjislacionit mbi bazën e kualifikimit dhe atë: Mësimdhënës me diplomë fakulteti tri dhe katër vjeçare 27% të pagës bazë, e ndër tjera ka shtuar se kjo kërkesëpadi është e paarsyeshme edhe për nga lartësia e shumës që është kërkuar. Sipas vendimit të qeverisë paditësit i marrin pagesat çdo muaj në bazë të kualifikimit-licencimit, por që sipas të paditurës paditësi në këtë rast nuk e ka ofruar licencën e punës si mësimdhënës nga MASHT-i. Poashtu sipas pretendimeve të të autorizuarit të së paditurës dispozitat e nenit të sipërcituar nuk kanë karakter imperativ dhe si e tillë nuk e obligon asnjërin nga subjektet e përfshira në procesin e licencimit dhe se nga kjo dispozitë shihet qartë se qëllimi i saj është ngritja kualitative për mësimdhënësit e angazhuar dhe asesi detyrimi për kompensim. Ky kompensim nuk është i përfshirë as në kapitullin IV të kësaj kontrate, ku në nenin 35, janë paraparë detyrimet për kompensim, ashtu që nga pika 4 deri në pikën 10 janë përcaktuar këto obligime financiare të së paditurës: kompensimi për orët shtesë, shpenzimet e udhëtimit, shtesa për përvojën e punës, shujta, paga jubilarë e përcjellëse dhe përfshirja e inflacionit në shkallë të pranuar nga enti i statistikave, por nuk është përfshirë edhe licencimi dhe obligimi i pagesës në shkallë siç është përcaktuar në nenin 7 të kësaj kontrate për shkak të mungesës dhe mosplanifikimit të buxhetit lidhur me kualifikimin arsimor. Për më tepër, paragrafin 3 të nenit 35 të kësaj kontrate qartazi përcaktohet se: *“Pagat e punëtorëve, punonjësve të sistemit të arsimit përcaktohen me aktet ligjore e nënligjore në fuqi. Për ndryshimet dhe shtesat, plotësimet dhe rritjet e mëtejshme të pagave të punonjësve të sistemit të arsimit, punëdhënësi është i detyruar që në procesin e hartimit të buxhetit të çdo viti të konsultohet dhe të marrë mendimin e SBASHK-ut, nënshkruese e kësaj kontrate, përpara se propozimet përkatëse të dorëzohen në Qeveri për miratim”*, andaj me rastin e kualifikimit, do

të rritet paga bazë e mësimdhënësve në mënyrë automatike, por që lidhur me ndryshimet në pagë të tyre duhet të zbatohen rregullat e sipërcituara. Ka theksuar poashtu se lidhur me këtë padi të parashtruar nga ana e paditësit e njëjta ka arritur parashkrimin në bazë të nenit 352 dhe 353 par.1 të LMD-së. Poashtu ka shtuar se padia e paditësit është paraqitur pas afatit ligjor në vitin 2024, kjo pasi kontrata kolektive e vitit 2021 është shkëputur nga MASHT-i me datë 22.11.2022. I ka propozuar gjykatës që padinë e paditësit ta refuzojë në tërësi si të pa bazuar sepse nuk ekziston asnjë bazë ligjore që ekziston si detyrim për të paditurën në bazë të kontratë kolektive të vitit 2021.

Lidhur me shpenzimet e procedurës nuk është deklaruar.

Me qëllim të vërtetimit të drejtë dhe të plotë të gjendjes faktike lidhur me çështjen konkrete juridike, gjykata i shqyrtoi këto prova dhe atë: Kontrata e punës nr.11/543 e datës 05.10.2017, diplomën e kualifikimit universitar nr.378, licenca e mësimdhënësit me nr.100023512 dhe listën e pagave të lëshuar nga buxheti i Republikës së Kosovës.

Gjykata pas shqyrtimit të padisë, provave që gjenden në shkresat e lëndës, si dhe përgjigjes në padi të paraqitur nga ana e të paditurës, në kuptim të nenit 8 lidhur me nenin 398 dhe nenin 399 të LPK-së, gjeti se janë plotësuar kushtet për dhënien e aktgjykimit jashtë seancës dhe erdhi në përfundim se kërkesëpadia e paditësit është pjesërisht e themeltë dhe si e tillë pjesërisht u aprovua.

Nga parashtrimet e palëve ndërgjyqëse të paraqitura me padi dhe përgjigje në padi, gjykata ka gjetur se nga Kontrata e punës për paditësin e lëshuar nga Komuna e Malishevës-Drejtoria Komunale e Arsimit dhe Edukimit (këtu e paditura), paditësi i lartcekur është në marrëdhënie pune tek e paditura në shkollën SHFMU "V.K." në fshatin Drenoc-Komuna e Malishevës, si mësimdhënës i lëndëve të gjeografisë, historisë dhe mësimi zgjedhor.

Nga diploma e kualifikimit universitar, vërtetohet fakti se: Paditësi Z.K.studimet e nivelit Bachelor i ka mbaruar me datë 26 mars 2015 (diploma nr.378) në Universitetin e Prishtinës "Hasan Prishtina", Fakulteti i Edukimit-Qendra në Prishtinë dhe ka marrë titullin Bachelor i Gjeografisë-Edukatë Qytetare. Po ashtu nga licenca e mësimdhënësit vërtetohet fakti se paditësja ka licencë të rregullt dhe lloj të licencës të karrierës me numër 100023512. Bazuar në listën e pagave të lëshuar nga Buxheti i Republikës së Kosovës, vërtetohet fakti se paditësi realizon pagë bazë në lartësi prej 400.14 Euro (kjo për faktin se në bazë të listës së pagave të vitit 2021 për periudhën nga data 01.05.2021 e deri me datë 31.05.2021 të lëshuar nga Buxheti i Republikës së Kosovës, **paditësi i realizon 19 orë pune në javë**, sipas kësaj përlllogaritjeje  $\approx 493.55$  Euro paga bruto – 38.01 Euro shtesa për përvojë pune – 55.40 Euro shtesa e paguar për kualifikim = 400.14 Euro, ashtu që gjykata e mori këtë pagë bazë gjatë përlllogaritjes së kompensimit të të ardhurave nga marrëdhënia e punës mbi bazën e kualifikimit-licencimit për periudhën e kërkuar nga data 01.02.2021 e deri me datë 06.02.2023) dhe në emër të kualifikimit me fakultet për çdo muaj paditësit i është paguar shuma nga 55.40 Euro dhe kjo listë e pagës vërtetohet edhe me datën e lindjes që përputhet me diplomën dhe me numrin personal. Gjykata konform nenit 329 par.1 të LPK-së, i cili përcakton

se “Shkresa të cilën e ka hartuar në formën e caktuar organi shtetëror brenda kufijve të kompetencës së vet, si dhe shkresa të cilën në formë të tillë e ka hartuar ndërmarrja apo organizata tjetër në ushtrimin e autorizimeve publike që i janë besuar me ligj (dokumenti publik), provon saktësinë e asaj që konfirmohet apo caktohet në të”, provave të lartcekura gjykata ia fali besimin e plotë ngase është bërë e besueshme fuqia provuese e tyre.

Gjykata gjen se në rastin në fjalë zbatohen dispozitat e Vendimit të Qeverisë së Republikës së Kosovës, me nr.01/33 të datës 29.08.2008. Kështu, në pikën 1. të këtij vendimi, përcaktohet që: “Nga 1 shtatori 2008 të gjithë mësimdhënësit, drejtorët (zëvendësdrejtorët) dhe bashkëpunëtorët profesional në shkollat e Republikës së Kosovës, do të kenë rritje të pagave të tyre në bazë të kriterëve të licencimit”. Ndërsa, në pikën 4. të vendimit në fjalë parashihet ngritja e pagës sipas shkallës apo nivelit të kualifikimit ose licencimit, në të cilën përcaktohet se: “Mësimdhënësit, drejtorët (zëvendësdrejtorët) dhe bashkëpunëtorët profesional, të pajisur: 1). Me diplomë të Shkollës Normale përfitojnë ngritje të pagës bazë prej 10%; 2). Me diplomë të Shkollës së Lartë Pedagogjike përfitojnë ngritje të pagës bazë prej 19%; 3). Me diplomë universitare 3 dhe 4 vjet përfitojnë ngritje të pagës bazë prej 27%. Pastaj, bazuar në mendimin juridik nr. 214/2023 të datës 09.10.2023, në pikën I të tij përcaktohet që: “Për kërkesat e mësimdhënësve për kompensim mbi bazën e kualifikimit (licencimit), kompensimi bëhet sipas kushteve dhe kriterëve të përcaktuara me Vendimin e Qeverisë së Republikës së Kosovës, me nr.01/33, datë 29.08.2008”. Pasi nga provat e lartcekura u vërtetua se paditësi është në marrëdhënie pune tek e paditura, se i njëjti ka diplomë universitare me titull Bachelor i Gjeografisë-Edukatë Qytetare dhe ka licencë të rregullt dhe lloj të licencës të karrierës, rezulton se konform vendimit të lartcekur, paditësit i takon e drejta e kompensimit të të ardhurave nga marrëdhënia e punës mbi bazën e kualifikimit.

Gjykata vlerësoj se e paditura nuk ia ka kompensuar paditësit pagën sipas përqindjes për shkak të kualifikimit shkollor, përkatësisht me Bachelor, pasi është paguar në shumën prej 55.40 Euro për kualifikim (fakt i provuar nga lista e pagave për periudhën nga data 01.05.2021 e deri me datë 31.05.2021), ndërsa sipas përqindjes së përcaktuar në Vendimin e Qeverisë, është dashur të paguhet në shumën prej 108.03 Euro, (27% e pagës bazë 400.14 Euro), me ç’rast i ka mbetur borxh paditësit për çdo muaj në shumën prej 52.63 Euro dhe atë për 24 muaj ( $400.14 \text{ Euro} * 27\% = 108.03 \text{ Euro} - 55.40 \text{ Euro} = 52.63 \text{ Euro} * 24 \text{ muaj} = 1,263.12 \text{ Euro}$ ), konkretisht për periudhën kohore nga data 01.02.2021 e deri me datë 06.02.2023, përkatësisht 24 muaj, ashtu që për këtë periudhë paditësit i takon diferenca për çdo muaj nga 52.63 Euro, ndërsa lidhur me lartësinë e kërkesëpadisë së aprovuar në shumën e përgjithshme prej 1,263.12 Euro, gjykata vlerësimin e saj e bazoj në listën e pagave të vitit 2021 për periudhën nga data 01.05.2021 e deri me datë 31.05.2021 e cila gjendet në shkresat e lëndës, të dorëzuara nga palët ndërgjyqëse, ashtu që për periudhën e aprovuar nga data 01.02.2021 e deri me datë 06.02.2023 në shumën e përgjithshme prej 1,263.12 Euro u bazua nga lista e pagave e që nga kjo listë e lartcekur, u vërtetua fakti që paditësi i realizon **19 orë pune në javë**, e që paga bazë i bie të jetë 400.14 Euro (493.55 Euro paga bruto – 38.01 Euro shtesa për përvojë pune – 55.40 Euro shtesa e paguar për kualifikim =  $400.14 \text{ Euro} * 27\%$  shtesa për kualifikim Bachelor (sipas vendimit të Qeverisë të vitit 2008) =  $108.03 \text{ Euro} - 55.40 \text{ Euro}$  shtesa për fakultet =  $52.63 \text{ Euro} * 24 \text{ muaj} =$

1,263.12 Euro), ashtu që sipas përlllogaritjes së gjykatës shuma e përgjithshme prej 1,263.12 Euro u aprovua nga gjykata duke u bazuar në listën e pagave të vitit 2021.

Meqenëse nga parashtrësja e padisë u konstatua se paditësi është në marrëdhënie pune tek e paditura, fakt ky që nuk u kontestua nga ana e të paditurës, dhe përkundër faktit se e paditura e ka kontestuar padinë dhe kërkesëpadinë e paditësit sa i përket kompensimit për kualifikim sepse sipas të njëjtës mësimdhënësit paguhet për çdo muaj për kualifikim, gjithashtu edhe për gjykatën të njëjtat janë të pa kontestueshme dhe si të tilla janë të besueshme dhe mbi bazën e provave të administruara, andaj gjykata konsideron se janë plotësuar kushtet për dhënien e aktgjykimit jashtë seance konform nenit 398 të LPK-së ku parashihet që: *“Kur gjykata, pasi t’i arrijë përgjigja në padi, konstaton se ndërmjet palëve nuk është kontestuese gjendja faktike, dhe se nuk ekzistojnë pengesa të tjera për dhënien e vendimit meritor, atëherë ajo, pa caktuar fare seancë gjyqësore, mund ta jep aktgjykimin me të cilën e pranon si të themeltë kërkesëpadinë”*, për çka vendosi si në pikën I. të dispozitivit të këtij aktgjykimi, duke ia aprovuar pjesërisht kërkesëpadinë paditësit për kompensimin e të ardhurave nga marrëdhënia e punës në bazë të kualifikimit dhe atë për periudhën nga data 01.02.2021 e deri me datë 06.02.2023.

Gjykata vendosi sikurse në dispozitiv të këtij aktgjykimi duke aprovuar shumat përkatëse dhe duke llogaritur kamatën ligjore, bazuar në nenin 382 par. 1 dhe 2 të LMD-së, duke e llogaritur të njëjtën nga dita e parashtrimit të padisë më datë 07.12.2023, bazuar në Mendimin Juridik për Kamatën të Gjykatës Supreme të Kosovës nr. 265/2020 të datës 02.12.2020, pasi në rastin konkret pala e paditur është vonuar në përmbushjen e obligimit ndaj paditësit.

Gjykata e ka vlerësuar pretendimin e të paditurës në lidhje me mungesën e bazës ligjore në kontratën kolektive pasi ky kompensim nuk është përfshirë as në kapitullin IV të kësaj kontrate, mirëpo këtë pretendim e refuzoi për shkak se baza e kërkesëpadisë rrjedh nga Vendimi i Qeverisë së Republikës së Kosovës numër 01/33 i datës 29.08.2008.

Sa i përket pretendimit të dhënë në përgjigje në padi se në rastin në fjalë kemi parashkrim të kërkesës në tërësi, ky pretendim është tërësisht i pabazuar, ngase kërkesëpadinë paditësi e bazon për periudhën e kërkuar prej datës 01.02.2021 deri me datë 06.02.2023, pasi konform nenit 87 të Ligjit Nr.03/L-212 të Punës, i njëjti ka përcaktuar se *“Të gjitha kërkesat nga marrëdhënia e punës në para, parashkruhen brenda afatit prej tri (3) vitesh, nga dita e paraqitjes së kërkesës”*, e që në rastin konkret duke pasur parasysh se padia është paraqitur me datë 07.12.2023, rezulton se për periudhën e lartcekur, duke vlerësuar afatin 3 vjeçar për parashkrimin e kërkesës në fjalë, gjykata erdhi në përfundim se paditësi e ka ndërprerë rrjedhjen e parashkrimit dhe ka ruajtur të drejtën për të kërkuar realizimin e kërkesës së tij në procedurë gjyqësore nga data e paraqitjes së padisë.

Më konkretisht, me paraqitjen e padisë në gjykatë më datë 07.12.2023, në kuptim të nenit 369 të LMD-së ku theksohet se: *“Parashkrimi ndërprehet me paraqitjen e padisë dhe me çdo veprim tjetër të kreditorit të ndërmarur kundër debitorit para gjykatës ose autoriteti tjetër*

*kompetent me qëllim vërtetimi, sigurimi ose realizimi të kërkesës”, gjykata vlerëson se në këtë rast është ndërprerë parashkrimi për periudhën 01.02.2021 e deri më 06.02.2023 dhe padia e njëjtë është paraqitur brenda afatit ligjor. Po ashtu, Gjkata pagën bazë të paditësit e ka llogaritur duke u bazuar në listën e pagave dhe kontratës së punës. Andaj, mbi këtë bazë gjykata e aprovoj pjesërisht kërkesëpadinë e paditësit sikurse në pikën I. të dispozitivit të aktgjykimit.*

Sa i përket pikës II. të dispozitivit të këtij aktgjykimi, Gjkata ka vlerësuar se nga sqarimet e dhëna si më lartë pjesa tjetër e kërkesëpadisë duhet refuzuar, ashtu që lidhur me këtë janë plotësuar kushtet ligjore për marrjen e aktgjykimit jashtë seancës të përcaktuara në nenin 399 të LPK-së, ku në paragrafin 1 të këtij neni është përcaktuar se: *“Kur gjykata, pasi t’i arrij përgjigja në padi, konstaton se nga faktet e treguara në padi nuk del themelësia e kërkesëpadisë, atëherë ajo do të jep vendimin meritor me të cilin refuzohet si e pathemeltë kërkesëpadia”,* ndërsa në paragrafin 2 është paraparë se: *“Kërkesëpadia është e pathemeltë, në vështrim të paragrafit 1 të këtij neni, po që se qartazi janë në kundërtënie me provat të cilat i ka propozuar paditësi, apo me faktet që janë botërisht të ditura”.*

Gjkata ka vlerësuar edhe pretendimet e tjera të palëve ndërgjyqëse por ka gjetur se të njëjtat janë pa ndikim në nxjerrjen e këtij aktgjykimi.

Vendimin që pala e paditur t’i bartë shpenzimet e procedurës, gjykata e ka mbështetur në dispozitat e nenit 449 dhe 452 dhe 453.2 të LPK-së, ndërsa sa i përket lartësisë së shpenzimeve të procedurës u bazua në nr. tarifor 6 të Rregullores për Tarifën e Odës së Avokatëve të Kosovës, që i referohet shumës prej 104.00 Euro për përpilim padie dhe për taksë gjyqësore në shumën prej 20.00 Euro (e paraparë sipas Udhëzimit Administrativ Nr.01/2017 për Unifikimin e Taksave Gjyqësore).

Prandaj, gjykata bazuar në arsyet e cekura më lartë, bazuar në nenin 143 lidhur me nenin 398 dhe nenin 399 të LPK-së, vendosi si në dispozitiv të këtij aktgjykimi.

## **GJYKATA THEMELORE GJAKOVË - DEGA NË MALISHEVË**

**Departamenti i Përgjithshëm/Divizioni civil**

**C.nr.25/2024, me datë 05.02.2025**

**G j y q t a r i**  
**Petrit Curri**

**KËSHILLË JURIDIKE:** Kundër këtij aktgjykimi është e lejuar Ankesa në afat prej 7 ditësh nga marrja e të njëjtit, përmes kësaj gjykate, për Gjykatën e Apelit në Prishtinë. Ankesa duhet të paraqitet në kopje të mjaftueshme për palët dhe gjykatën.